

T 5236.7 / 2213

11

11  
5

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE  
MAR 14 1932

皇明文徵卷十三

晉江何喬遠行孝選

七言古

御製

宣宗章皇帝

臣何喬遠恭輯

太液池送黃淮辭政

天香早折仙桂枝  
筆花五彩開鳳池  
蓬萊之仙

直奎璧近侍九重天  
咫尺承樂聖人臨

御初鞠躬稽首陳嘉謨  
仁宗監國文華

皇明文徵卷十三

皇明文徵卷十三

晉江何喬遠稗孝選

哈佛大學哈佛葉宗  
圖書館珍藏印

七言古

御製

宣宗章皇帝

臣何喬遠恭輯

太液池送黃淮辭政

天香早折仙桂枝筆花五彩開鳳池蓬萊之仙

直奎璧近侍九重天咫尺

永樂聖人臨

御初鞠躬稽首陳嘉謨

仁宗監國文華

殿左右謀猷共羣彥朕承大寶君萬方相與共  
理資賢良傾心寫情任舊老而卿引疾先還鄉  
五歷星霜復相見霜鬚蕭蕭秋滿面是時朝旭  
光升紫殿明相對清言良慰情留之累月未盡  
意歸心又欲東南征太液清泠涵碧藻楊柳芙  
蓉相映好鳧鷖瀾瀾弄清波紫霧紅雲拂瓊島  
芳殺在俎酒在壺工歌鹿鳴續白駒君臣大義  
士所重心雖庭闕身江湖鴈蕩峯高高不極中  
有謝公舊遊跡采芝劔苓可長年應在天南憶

天北

喜雪歌賜兵部尚書張本

天氣肅肅當嚴冬大地凜冽號朔風扶桑曜雪  
韜瞳矐屏翳一色浮鴻濛斯須素景搖太空霏  
花糝葉何茸丰六出巧自造化工覆纒敷縞遠  
近同綴瓊貼珞緣墻墉輕盈宛轉穿簾櫳千門  
萬戶光玲瓏積平坎窞增丘封凍合溝瀆流靡  
通林沼幻出銀芙蓉遂令松篁失青葱翰飛蠕  
動寂歛蹤萬幾之暇坐九重豈不自足鮮與醲

一念所重存瘵恫荷戈披甲防虜戎况復懷此  
爲冲冲維時預兆年歲豐滋潤麩麥消螟螽騰  
歡溢喜畎畝農

縉紳

劉基

題陸放翁賣花叟詩後

君不見會稽山陰賣花叟賣花得錢卽沽酒東  
方日出照紫陌此叟已作醉鄉客破屋含星席  
作門濕螢生竈花滿園五更風顛雨聲惡不憂  
屋倒憂花落賣花叟但願四海無塵沙有人賣  
酒仍賣花

張以寧

贈安南善書阮生生名太冲爲予書春  
秋春王正月考及安南行藁予喜其楷  
法適美更其字曰用和而詩以贈之

安南有生阮太冲隸書國中稱最工勁如精兵  
槩善舞疾若快匠斤成風老夫持節使絕域眼  
昏頭白垂龍鍾著書暇日使之寫一笑聊作舒

心曾寫書設官自漢代嗟汝乃在炎荒中迢迢  
嶺表產丹荔鬱鬱澗底生青松我興爲爾作長  
句生起再拜生春容獨不見瓊州姜生遇蘇子  
姓名亦可傳無窮

贈安南善書阮生生名廷玠爲予書春  
秋春王正月考及安南行橐予喜其楷  
法適美更其字曰寶善而詩以贈之

安南有生阮廷玠隸書國內知名最整如老將  
嚴甲兵莊若端人正冠帶老夫持節使炎州頭

白眼昏今老大著書暇日使之寫一笑令人心  
目快唐時選人用楷法嗟爾乃在要荒外翡翠  
天涯隱羽毛蛇珠海底沉光怪我興爲爾作長  
歌生起修容重再拜獨不見僂耳黎生遇老坡  
亦得姓名傳後代

二詩亦一段奇事三  
詩一體亦一奇也

高啓

唐昭宗賜錢武肅王鐵券歌

妖兒初下含元殿天子仍居少陽院諸藩從此  
擁連城朝貢皆停事攻戰岐王已去梁王來長

安宮闕生蒿萊天目山前異人出金戈雙舉風  
煙開羅平惡鳥啼初起犀弩三千射潮水歸來  
父老拜旌旗醜酒搥牛宴鄉里貂裘駿馬驕春  
風錦袍玉帶真英雄詔書特賜誓終始黃金鏤  
字旌殊功虎符龍節彤弓矢後嗣猶令赦三死  
盡言恩寵冠當時天府丹書未踰此摩挲舊物  
四百年古色滿面凝蒼烟天祐宰相署名在尋  
文再讀心茫然古來保族須忠節愛此幾人還  
覆滅王家勲業至今傳不在區區一方鐵人生  
富貴知幾時泰山作礪徒相期行人曾過表忠  
觀風雨斷蘚埋殘碑

孫蕢

次武昌

大風吹船如馬走船頭水聲作牛吼掛帆初發  
岳陽磯轉柁俄灣武昌口武昌城頭黃鶴樓飛  
簷遠映鸚鵡洲漢陽樹白烟景濕行人如鷗沙  
際立江南風土寒氣遲居人九月着絺衣酒旗  
臨江開竹屋當鑪小姬能楚曲蜻蜓船尾旋回

風今夕停船酒家宿

鹽井

寒泓石底莓苔冷百尺長梯掛殘綆荒山寂寂  
無飛烟父老相傳古鹽井灤東灤西十萬家煮  
鹽射利爲生涯筠筒直下汲清泚出釜燦白如  
霜花太平幸覩烽火息十年今無二三百官封  
此井不敢開歲歲渝州買鹽食

發忠州

顛風翻山雲墨墨星河無光江翁翕搖船夜半

發忠州漩深浪緊船欲立宣公祠下灘嘈嘈船  
頭着水低復高石稜割裂箕斗影山鬼出雜魚  
龍號亦知風水莽回互王事有程那得顧誰歌  
太白蜀道難和我靈均遠遊賦

下瞿塘

我從前月來西州錦官城下十日留回船正值  
九九節巫山巫峽風颼颼人言灩澦大於馬瞿  
塘此時不可下公家王事有程期敢憚微軀作  
人鮓人鮓甕頭翻白波怒流觸石爲漩渦松公



敲板助船客破浪一撇如飛梭灘聲橈聲歷亂  
聒緊搖手滑橈易脫沿洄劃轉如旋風半側船  
頭水花沒船頭半沒船尾高水花作雨飛鬢毛  
爭牽百丈上崖谷舟子快捷如猥獠櫓船把酒  
聊自勞因笑輕生博奇好吟詩未解追謫仙天  
遣經行蜀中道巴東東下想安流便指歸州向  
峽州船到岳陽應漸穩洞庭霜降水如油

方孝孺

題嚴子陵

敬賢當遠色治國須齊家如何廢郭后寵此陰  
麗華糟糠之妻尚如此貧賤之交奚足倚羊裘  
老子早見機獨向桐江釣烟水

蕨箕行

並海饑民千百數携鋤上山斫山土蕨根已盡  
斫不休力絕筋疲未言苦屋頭五日無炊煙十  
步九却行不前全家性命係朝莫弱子假息阿  
母眠昨日斫蕨僅盈斗今日蕨根不滿手但憑  
斫蕨保餘生再拜青山感恩厚青山青山爾勿

猜明朝未死携鋤來

海米行

海邊有草名海米大非蓬蒿小非薺婦女携籃  
晝作羣採掇仍於海中洗歸來滌釜燒松枝煮  
米爲飯充朝饑莫辭苦澁不下咽性命聊假須  
臾時皇天不仁我當死况乃催科急如矢來年  
擬作日月期欲保餘生更俟爾嗚呼棄止不復  
陳椎牛酣酒何爲人

劉秩

裁衣行

裁衣須裁短短衣短衣上馬輕如飛縫袖須縫  
窄窄袖窄袖彎弓不礙肘短衣窄袖樣時新慙  
慙寄語從軍人願郎著衣便弓馬破敵長驅古  
城下明年佩印披紫緋裁衣不比從軍時

瞿佑

故宮嘆

金輪夜半北方起炎精未墜光先死青衣去作  
行酒人泥馬來爲失鄉鬼江頭宮殿列嶺岼湖

上笙歌樂宴安魚羹自從五嫂乞殘酒却笑儒  
生酸格天閣上燒銀燭申王計就斬王逐累世  
內禪諱言兵中興之功罪難贖開邊釁動終倒  
戈師臣函首去求和木綿庵下新鬼哭誤國重  
逢賈八哥琉璃作花禁珠翠上馬裙輕淚妝媚  
朔風吹塵笳鼓鳴天目山崩海潮避往事興亡  
誰與論亭亭白塔鎮愁魂惟有棲霞嶺頭樹至  
今人說岳王墳

李德

唐仙方技圖

開元天子承平日錦繡山河壯京室金殿璇題  
表集賢玉屏粉繪圖無逸夔龍接武居阿衡萬  
方旭日當文明衡山老僊何所有亦復通籍承  
恩榮縞衣白髮酡顏老自說時來致身早綵篋  
初開玉仗分白騾突出銀鞍小榻前製號賜通  
玄始信人間別有天樓船未遣葢珠賜歲籥俄  
更天寶年九齡歸臥曲江上牛郎又入中書相  
花雨香飄蘭若鍾柳雲春撲金鷄帳萬機日少

樂事多梨園法譜聲相和鬪鷄舞馬看不足不  
獨仙人乘白騾仙人豈是呈仙技畫者傳之有  
深意延秋門外羽書飛却駕青騾向西避青騾  
劍閣雨淋鈴一段閒愁尚不勝不道畫圖今若  
此碧雲芳樹滿昭陵

練子寧

三月望日與饒隱君子宏遊玉笥山謠  
我懷謝康樂獨往遊名山身同雪舟繫心與浮  
雲閑清風淡蕩灑六合令我興在雲松間玉山  
高與南斗齊雲錦照耀廬山低三十六峰凌虹  
霓飛湍噴雪臨迴溪長松掛月青猿啼上有梅  
仙採藥之幽棲下有蕭雲讀書之故基洞天石  
扇查莫測瑤草謾長三春莢我欲因之覽八荒  
手拂青蘿眠石牀回飈吹散碧天霧清冥倒瀉  
澄湖光作爲玉山謠寄之雙峰客興來携妓秋  
復春笑殺東山謝安石

曾棨

燉煌曲

吐蕃健兒面如赭走入河湟放胡馬七關蕭索  
少人行白骨戰場縱復橫燉煌將士抱戈泣四  
方胡笳聲轉急烽煙斷絕鳥不飛十一年來不  
解圍傳檄長安終不到借兵回紇何曾歸愁雲  
慘澹連荒漠捲地北風吹雪落將軍錦韉暮還  
控壯士鐵衣夜猶著城中疋綾換斗麥決戰寧  
甘死鋒鏑一朝胡虜忽登城城上蕭蕭羌笛聲  
當時左袵從胡俗至今藏得漢衣服年年寒食  
憶中原還著衣冠望鄉哭老身幸存衣在篋官  
軍幾時持獻捷

### 龍支行

龍支城頭暮吹角黃雲蔽天沙草薄虎髯使者  
長安來持麾擁蓋邊塞開城門盡是胡兵守城  
外老人多白首拜迎使者雙淚流問云天子今  
安否自言世家豐州住少小辭家隸軍戍吐蕃  
昨日犯蕭關胡騎長驅涇隴間將軍戰敗鼓聲  
絕棄戈遺鏃填丘山自從陷沒身爲虜五十年  
來在邊土依棲部落作蕃人生長兒童盡胡語

朝看烽火望中原夜聽鳴笳思故園頽垣破屋  
誰家宅斷磧荒谿何處村奉使還時報天子蚤  
遣官軍復清水假令老身歸卽死已免遊魂作  
胡鬼

胡儼

遠將歸

去年與郎別楊花飛白雪今年候郎歸楊柳綠  
依依聞郎買船下湘渚日日門前望行旅行人  
過盡乳鴉啼徘徊日暮空延佇攬衣回洞房對  
鏡下新妝那知清漏短但愛月明月光照席  
涼於水帳裏燈花撒紅蕊好事從來不浪傳明  
日升堂報姑喜

何喬新

讀西臺慟哭記

北風怒撼龍舟覆十萬貔貅葬魚腹廬陵魁輔  
死燕山頸血化爲原草綠當時門下多俊才烏  
散雲消那敢哭裂冠毀冕彼何人俯首穹廬食  
讐粟轅門從事抱孤憤芒屨潛行巖瀨曲肯隨

留葉立新朝甘與方吳卧空谷朔風直上千仞  
臺采采溪毛薦寒淥歌殘楚些招不來蕭瑟寒  
飈振林木仰天長慟天亦愁山鬼驚啼猿躑躅  
冬青樹下頻往還淚眼摩挲望天目鳳逝龍亾  
土氣消日暮驚鳥止誰屋寒裳幾度濯江濤尚  
恐胡塵浣吾足帝曰巫陽汝下招促駕青虬歸  
玉局饒歌騎吹世空傳月表未成竟誰續毅魄  
雖埋神不沒仙遊想在文山麓

過雞冠隘弔曹將軍

將軍諱友聞舉進士調天水教授會  
蒙古攻城糾合義兵拒之虜解圍去  
制置使製大旗書滿身膽以表之且  
檄控扼蜀口有功累遷驍衛大將軍  
已而蒙古合女真吐蕃回紇之兵五  
十餘萬入寇將軍與弟友萬拒戰于  
此虜死傷無算血流二十里救兵不  
至兄弟俱死于陣全軍盡沒無一降  
者嗚呼烈哉

曹將軍素鳩闔帥闔稱爲滿身膽橫戈躍馬剪  
天驕赤霧彌空天氣慘胡塵瀕洞鐵山摧青野  
原頭萬騎來漢川士女走失魂嬰孺棄擲聲哀  
哀將軍慷慨髮上指兄弟齊驅誓同死右持龍  
劍左蛇矛斬刈羣胡如斬豕雞冠隘口血成河  
健馬強兵來益多風淒雨急虜氛惡天不祚宋  
將柰何喧呼動地地欲裂凍鼓無聲寶刀折綿  
裘濕透足難移猶奮空拳抗胡羯虎倒龍顛互  
啖吞山川震眩腥霾昏罵聲愈高頭已斷怒氣  
勃勃如生存君不見呂家兄弟忍降虜遺臭至  
今誰比數將軍死去三百年赫赫英名照今古

丘濬

岳王墳

我聞岳王之墳西湖上至今樹枝尚南向草木  
猶知表蓋臣君王乃爾崇奸相青衣行酒誰家  
親十年血戰爲誰人忠勛翻見遭殺戮胡兒未  
必能亡秦嗚呼臣飛死臣浚喜臣浚無言世忠  
靡檜書夜報四太子臣構再拜從此始



挽羅都御史

正統己巳北虜侵入當道者建議趣  
召宣府總戎官率兵入衛京城或欲  
遂棄其城衆紛然爭就道時羅公爲  
都御史巡撫其地乃毅然仗劍坐當  
門拒之且下令曰敢有出者手斬之  
衆遂定口外人至今能言之而修宣  
府志者亦載其事公平生事業固多  
而此舉猶爲卓偉抑菴先生作墓志  
略不及何也濬初來京師時嘗拜公  
于寓所極蒙獎諭及濬登朝公已致  
仕家居不久捐館舍矣辦香致敬其  
道無繇茲因其壻鍾轅應貢來致其  
子泰命求輓章因次第完城事爲韻  
語以補公志之略云

六飛北狩無消息邊城四望狼烟赤胡馬長驅  
去復來何人却建捐邊策鎮朔將軍生入關北  
門鎖鑰空餘環強兵健馬盡南走黃塵蔽日天

漫漫白首憲臣南海客手持一劍當門立誓與  
孤城同死生怒髮衝冠氣千尺車輪生角馬駐  
蹄居人不動行人歸叱咤之間樓櫓具金城鍊  
壁湯爲池雲州失守赤城破胡兒躡足城邊過  
老妻稚子盡登陴公亦援枹雪中坐山前山後  
無數城此城屹立如巨屏虜騎南來資扼塞王  
師北出恃屯營屏蔽京師功卓偉設有長城長  
萬里江淮果賴張真源河朔僅餘顏御史憂國  
勞邊兩鬢霜事成乞骨歸故鄉肘金腰玉者塞  
路無人上書訟陳湯一葉扁舟五湖水漲海邊  
頭亂山裏折簡不通朝貴事抱膝長吟聊爾爾  
羅浮山崩天墜星乾坤一夜收英靈公兮生死  
已無愧邊人至今嗟未平邊人能言不能紀慚  
我鄉生官太史聊述人言作些詞書罷長歌淚  
如洗

李東陽

長江行

大江西來是何年奔流直下岷山巔長風一萬

里吹破鴻濛天天開地闢萬物茁五嶽四瀆皆  
森然帝遣長江作南瀆直與天地相周旋是時  
共公怒觸天柱折遂使后土東南偏女媧補天  
不補地山崩谷罅漏百川有崇之叟狂而顛坐  
看萬國赤子淪深淵帝赫怒罰乃罪神禹來乘  
四載驅大章走豎亥黃龍夾舟穩不驚直送馳  
波到東海朝離巴峽暮洞庭九派却轉潯陽城  
縈紆南徐萬餘里更萬餘里通蓬瀛君不見黃  
河之水天上下其大如股空縱橫長遊清濟出  
中境曷敢南向爭權衡千流萬派瑣瑣不足數  
雖有吐納無虧盈下亘厚地上摩高空日月出  
沒蛟龍所宮奇形異態不可以物象但見變化  
無終窮或如重胎抱混沌或如顛氣開穹窿或  
如織女拖素練或如天馬馳風駿空山愁哮飽  
後虎巨壑下飲渴死虹或如軒轅鑄九鼎大冶  
鼓動洪鑪風或如夸父逐三足曳杖狂走無西  
東或如甲兵宵馳聚嘯滿山谷或如神鬼晝露  
萬象出入虛無中吁嗟乎長江湖爲若茲雄人

不識無乃造化之奇功天開九州十有二山南  
北並峙江流其間堯舜都冀方三苗向爲頑魏  
帝倚天歎征吳但空還吁嗟乎長江其險不可  
攀古來英雄必南驚我

祖開基自江渡

古來建國惟中原我

宗坐制東南藩始

知天險不足恃惟有聖德可以通乾坤長江來  
自西極包人寰環帝宅我來何爲爲觀國汎吳  
濤航楚澤笑張騫悲祖逖壯神功歌聖德浩蕩  
如江波千秋萬歲同山河而我無才竟若何吁  
嗟乎聊爲擊節長江歌

華山圖歌爲喬太常宇作

嗟哉此山吾不知其幾千丈今但見巍然屹立  
乎天中中有三峰聳拔而直上部位離立西南  
東諸峰羅列在其下有似父老隨兒童縱令立  
表以識不得算雖有記里之鼓難爲功我聞上  
古之世開鴻濛沙水盪汨相結融融者爲泥滓  
結者爲石爲山峰石堅山積理亦爾試看崛拔  
斬削別有造化之神工山名五嶽此其一特出

似異衡與嵩天門重重隔烟霧鐵鎖緣崖引長  
路掘衣欲進苦不前十步行時九回顧山腰流  
泉如瀑布仙掌撐空若承露虎踞龍蟠各有形  
鸞騫鶴舞紛無數置身忽在中峰頂極目乾坤  
莽迴互秦關蜀徼屹塞豈足論遙指扶桑最高  
樹噫吁噉自有天地今卽有此山萬物代謝兮  
山巋然古人今人到者相接踵誰復騁步窮其  
巔我生好古厭塵俗險絕獨慕昌黎韓昔年南  
遊復東眺二嶽只尺不一攀我客西來詫我以

大觀歌聲上徹秦雲端畫圖指點向空廓已覺  
天上非人間喬生喬生如此好奇者世不可以  
多得安得與一日遍歷于噴岬

### 花將軍歌

花將軍身長八尺勇絕倫從龍渡江江水渾提  
劍躍馬走平陸敵兵不能逼主將不敢嗔殺人  
如麻滿川谷徧體無一刀鎗痕太平城中三千  
人楚賊十萬勢欲吞將軍怒呼縛盡絕罵賊如  
狗狗不狺檣頭萬箭集如蝟將軍願死不願生

作他人臣郤夫人赴水死有妻不辱將軍門將  
軍侍婢身姓孫收屍葬母抱兒走爲賊俘虜隨  
風塵寄兒漁家屬漁姥死生已分歸蒼旻賊平  
身歸竊兒去夜宿陶穴如生墳亂兵爭舟不得  
渡墮水不死如有神浮槎爲舟蓮爲食空中老  
父能知津孫來抱兒達行在哭聲上徹天能聞  
帝呼花雲兒風骨如花雲手摩膝置泣  
復嘆雲汝不死猶兒存兒年十五官萬戶九原  
再拜君王恩忠臣節婦古稀有嬰杵尚是男兒

身英靈在世竟不朽下可爲河嶽上可爲星辰  
君不見金華文章石室史嗟我欲賦豈有筆力  
回千鈞

馬船行

南京馬船大如屋一舸能容三百斛高帆得勢  
疾若風咫尺波濤萬牛足官家貨少私貨多南  
來載穀北載鹺馮官附勢如火熱邏人津吏不  
敢詰爭徂鬪捷防轉欺倏去忽來誰復知乘時  
射利習成俗背面却笑他人癡他人雖癡貧亦

樂明朝犯令爾輩縛官家號令時復傳津吏如  
今更索錢

吳寬

戊申燕九日

正月十九爲元長春丘眞  
人生辰京師人爲會甚盛

京師勝日稱燕九少年盡向城西走白雲觀前  
作大會射箭擊毬人爲吼古祠北與學宮依簫  
鼓不來牲醴稀如何義士文履善不及道人丘  
處機

陳鉞

古塚行

昔人此塚初成日春雨我碑土花碧清明歲歲  
拉親朋醜酒刲羊酌苔石一朝無主漸榛荆隙  
地猶付居人畊陵遷谷變作城邑千門萬戶皆  
朱甍古黃學宮在高處桃李成陰聯玉樹宮前  
數仞夫子墻墻下誰知古人墓地中神物難久  
埋清宵變化乘風雷怒濤捲地墓間裂石碑斷  
落銅棺摧可憐枯骨已成土沙瘞金釵留半股  
甕甌古雅明如玉寶鏡無光苔色古呼童磨洗

尋紀年背無款識飛鸞旋嗟爾英雄九泉隔滔  
滔逝水無回源古來荒塚狐兔穴此塚今爲蛟  
龍得狂夫感慨悲復歌歌罷淒風淚沾臆百年  
有酒且啣杯莫待後來人嘆息

桑悅

重續麗人行

洛陽三月春無主桃花落盡清明雨名園接葉  
暗棲煙可教鶯燕無言語陌頭車騎何紛紛顧  
盼似空遊女羣柔情薄射伊水月倦思怕領龍

山雲就中八姨最年少上馬臨風殊窈窕白日  
棲迷天暗垂萬姓遊魂隨一笑當時宰相名國  
忠幾回並轡朝真龍綃裙六幅行委地峽水拖  
入華清宮杜陵老翁慣饑餓半生只對山妻卧  
酸眼驚看絕世姿錯認九天玄女墮此翁向後  
攢百憂潼關戰骨堆心頭始知昔日眼中見寶  
鈔銀盃皆干予君不見巍巍文武開周國削義  
降仁褒姒色再觀青史發長嘆丹臉雙刀古無  
敵



分韻得江字贈括蒼樊時登

混沌初分兮蒼天無語其氣何淳龐假孔子孟傳  
消息今天語漸漏鄒魯邦後孔子孟二千餘載兮  
文人韻士幹天立說日與造化相擊撞帝憫造  
化之破碎兮爰命律令奔走六合收拾散語歸  
天腔誰知妙語盡羽化能上天下地兮掉無楫  
有爲飛艘律令索書天帝怒敕壅福海不使通  
文江收彼玉珮贈以寒缸生前富貴不可致從  
伊九鼎一筆扛所以吾儒貧到骨聲名官職無  
絲雙樊君少秉匡世志何事更擁騷壇幢京華  
旅食三十載囊垂罄兮止有健筆如長杠用違  
其才志不展自古莫辯珉與珉贈君煮沆瀣之  
石鼎兮送君釀太和之玉缸坐風施雨有餘暇  
默飲元氣臥北窓

莊杲

鍾欽禮畫牛

東風渺渺平原綠幾處浮江春帶犢短策耕罷  
一犁歸數畝山陂雨初足薄田我亦耕定山六

角未能終日閒一笑還尋飲牛處夕陽疎柳前  
溪灣君不見江山萬古驅牛樣用則耕田閒則  
放

陳璉

精衛辭哀陳烈婦

有序

宋幼主絲閩入廣師次厓山烈婦屬  
其子李佳往事之臨別與訣曰勿以  
我故而懷二心遂趨廣赴水死聞者

哀之

東海有精衛啣石填海死海枯石復爛此恨何  
時已天目山崩王氣消北風夜退錢塘潮厓山  
新稱行在所萬里兵塵漲九霄南海有烈婦能  
守陵母節淚血滿衣裾泣與兒決別萬古綱常  
日月明爾當盡忠吾盡節黃木灣頭風雨來扶  
胥海口浪如雷此時孤憤同精衛一墮滄溟竟  
不回滄溟之深有時竭烈婦之名應不滅

邵珪

馬鬪虎

天門名馬真龍媒萬里新自流沙來先皇知爾  
才磊落放入虎圈與虎搏霜蹄蹴踏虎卽斃英  
風颯爽來天際當時觀者應嘆嗟唐家豈有拳  
毛騮

史德敏

宮遊圖

瞳矐日散晴霞早十二樓臺報春曉珠簾揭處  
管絃鳴五色雲隨鳳飛繞女娥魚貫列兩行雲  
鬢高髻垂明璫遙瞻別殿出深院導引宮車過

曲廊一時宛似神仙聚不識何因向何處漏聲  
疑在隔花聞樹影不隨流水去從來蓬島路難  
通誰得雲階見玉容拈毫感慨丹青畫知是吳  
宮是漢宮

馮蘭

次韻答謝木齋山亭寫懷

林上飛泉林下過大石可眠還可坐中峰正面  
着此亭左右雙峰恰相佐亦知真樂卽歐陽六  
物之中翁一箇遠岫雲來拂棟低平湖月出當

門大花燃晴塢爛成堆鷺下烟蕪輕點破雲菘  
香老碧勝芹徑竹叢生紫於蔗意到看山自捲  
簾情真留客同開筍乞老初從東閣歸行樂况  
值西疇暇蓼天過雨秋十分桂霰吹風香百和  
此亭只隔雪湖南杖舄相從敢辭情明朝有約  
亭上游老子聞歌已心荷

王鏊

韓文公藍關圖爲陳以嚴賦

韓公不信佛肯信世有仙牡丹花上誰所賦一

朝雪擁藍田關阿湘幻化有如此神仙燭燭在  
眼前使公一語稍低屈携手同往良非難胡爲  
騎馬浪自苦祗令收骨江之邊乃知此公曾中  
屺嶧有壯氣抵死不肯從湘言當時果州有謝  
女白晝居室生雲烟須史上升衆所見公謂魑  
魅物怪其逢旃後來儒者頗好異遂令末世坎  
離龍虎紛紛傳乃知韓公不可及泰山北斗不  
獨文章然

送吳縣簿董仁之任鄞丞

自頃權奸偷國柄一時在位貪相競剝民膏血  
輸權門廉耻掃地寧復存誰知小官之中乃有  
吳縣簿守法廉平獨如故三年佐縣民愛深視  
金如土民如金每言吳人窮到骨吾此腹削吾  
何心吳縣簿真難得我欲言之顧非職一朝擢  
官向寧波於乎柰此吳民何

送王懋綸僉事之蜀

君不見唐永貞宋熙寧國權盜弄威恣行扶奸  
黨穢擯異已蠻荒瘴徼多公卿又不見唐元和

末宋元祐天開公道明如畫海濱淪落皆來歸  
羣小倉皇似蛇狄人生行止豈偶然宵人紛紛  
空作奸當時只詫鬼謀秘今日那知天道還送  
君此語君應笑劍閣蛾眉好登眺

石瑤

有所思

雙星熒熒隔秋水秋入城頭漏聲裏窓間梧桐  
風瑟瑟青鳥南飛月華白朱絃一撥意已傳夢  
繞博山雙紫烟藕絲易脫雲易散十二碧峰秋

雨前

何孟春

宮人斜

芳魂豔魄春不死歲歲東風幻桃李紅慙白慘  
若為情雨妬雲嬌正難理守宮痣臂無銷期天  
子恩深合到誰昭君去作胡中鬼飛燕仙乎未  
可知

邵寶

世恩席上答諸公

我行西江自江東載書千里乘天風今夕何夕

詩壇中碧瞳共照燈花紅歐陽居士蘇坡翁文

星爛熳今古同不才有幸承諸公翰林四老儒

之通

宜興吳克溫華亭顧士廉  
太倉毛憲清姑蘇吳南夫

金石一振萬籟

空司封

金齒張進之

明並兩考功

太原喬希大宜興杭世卿

高堂

白日懸青銅少遊

秦國聲

才思如冥鴻江湖渺渺

誰能窮職方

柳陽何子元

平生懷至忠每談疆場思

彎弓從容授簡錢南宮

世恩總會諸壑歸三洪清

秋携對江上楓亦有短句隨鳴蟲雲霄北上勞

湘筒

張琦

短歌行

有翁野泣淚滿眼掇衣涉水水過腕時饑野雀  
鳴啾啾隨風入屋如有求物性無過得一粟翁  
雖三食百憂足東鄰馱馱割生鵝享賓樂客酒  
滂沱鳥性只求無網羅朱門雖高不相過

夜半溪上

月色不減昨夜好秋霽家家夜飯早蔓菁苣芋子

白酒香土門竹舍黃花老農談悠悠靜可聽皆  
說官家今太平斗斛上倉不過槩差船點馬無  
兼丁翁哺弱孫婦抱子依依相對桑麻裏我願  
明月長此光不照離愁照歡喜

程敏政

狼石行

今在闕  
武場內

北固山前兩拳石野花茫茫土花碧大如昂犬  
三尺強小似伏羔才一尺云當漢末風塵紅老  
瞞勢欲吞江東桓桓帝胄孫討虜並坐此石論

雌雄想像時危屏人語慘澹風雲眇蛇鼠赤壁  
成功指顧中石上誰賓復誰主烏林一捷荊州  
分同獎王室収奇勛小兒好緣敗盟好舞智蹶  
戎髯將軍漢鼎分明淪異姓質子封侯甘僞命  
可惜稜稜不解言恨入江聲寄餘興今逢一統  
天下王鉞甕城西開閱場將軍中峙列萬壘此  
君却在城東方我來適過城下路停車摩挲日  
將暮欲從故老借圖經爲爾臨風寫長賦

都憲張公淮上所獲四印歌

予被召北行道出淮陰巡撫都憲張  
公汝器觴予言往歲奉勅濬漕河得  
古印四枚于揚子橋水中已上進矣  
其一曰壽亭侯印其一曰鎮江府御  
前駐札都統制印其一曰鄂州管內  
觀察使印其一曰都巡檢使之印惟  
壽亭侯印爲漢物人知之其餘莫之  
考也予因言壽亭侯印據傳記凡三  
見于宋元之間蓋後人追鑄以奉神



者此恐其一也史稱韓世忠嘗爲鎮  
江府御前駐札都統制岳飛嘗爲鄂  
州管內觀察使此二印殆宋物歟都  
巡檢使亦宋官主捕盜賊以守臣兼  
領今不註其職守所在莫知爲誰矣  
語次得長詩一篇贈公用紀其事公  
與予進士同年予兄事之

行臺使者清河公濟川來往長淮東役夫走告  
得四印不知何代淪淵中盤螭結紐各異狀蘚

包玉齒傷青銅自應神物不可問月夕往往虛  
晴虹一朝昇出馮夷宮寶氣盡發清泠空行臺  
得之三歎息謂爾古器遭沙蟲亂磨再使篆文  
出拂拭不遣纖塵蒙題緘頓首獻  
天子

護以黃袱馱青聰近臣奉入歸御府想像白日  
回重瞳我來艤棹淮水上十年相見驚秋蓬  
坐間傾倒忽語此便覺異代還英風憶昔中山  
啓炎祚絕世義勇稱髯翁斬王鄂王總人傑南  
渡百戰勳猷同當時遣使各賚賜尚方新鑄憑

良工繫之尺組表異眷副以大纛兼彤弓豈知  
變故生肘腋斬地敗此中興功孫權心久附漢  
賊秦檜力主和金戎兩人伏劍狗王室霜飛六  
月愁蒼穹一人湖上跨長耳漫勞矰繳窺冥鴻  
都巡歲遠失姓字無乃亦是千夫雄撫時感事  
數百載令人扼腕悲三忠行臺於我同榜士呼  
酒更酌開蓮筒桑榆誼深談塵洽菘韭味潔冰  
盤豐春風吹花助客醉解舟北去方匆匆海天  
回首推雙蓬淮流浩蕩山巒嵒爲公高歌重懷  
古城樓一抹斜陽紅

陳獻章

贈陳冕

南有滄溟水北有崑崙山我屋正在溪山間瞻  
望不遠行實難白雲朝暮常漫漫桃花欲開梅  
又殘問君此去何時還

李夢陽

奉送大司馬劉公歸東山草堂歌

東山有草堂縹緲雲嶠孤前對祝融峰下瞰巴

陵湖明公昔時此堂居麋鹿熊豕當牕趨洞庭  
日落風浪湧倒影射堂堂欲動慘淡誰聞紫芝  
曲獨善不抹蒼生哭

先帝親裁五色詔

老臣曾受三朝祿此時邊徼多戰聲曳履謁帝  
登承明謝安笑却淮淝敵魏相坐測單于兵九  
重移榻數召見夾城日高未下殿英謀密語人  
不知左右微聞至尊羨自從龍去不可攀公亦  
臥病思東山湘娥含笑倚竹立山鬼窈窕堂之  
側上書苦死只欲歸

聖旨優容意悽惻

內府盤螭縷金織賜出傾朝皆動色白金之鉞  
紅票記寶鈔生硬雅翎黑崇文城門水雲白是  
日觀者塗路塞城中冠蓋盡追送塵埃不見長  
安陌人生富貴豈有極男兒要在能死國不爾  
抽身早亦得君不見漢二疏千載想慕傳畫圖  
卽此草堂何處無祿食覩竊胡爲乎乃知我公  
真丈夫嗚呼乃知我公真丈夫

鄭生山遊歸予作此歌

跂予望之六六峰欲往爭柰今嚴冬石林崎嶇

積雪盛日中無煙虎豺病生也孤往胡所希凍  
攀幽嶮探其微手皴面黑逾旬歸太室少室何  
者奇曾否首陽歌采薇北邙逶迤清洛遠天白  
冰崇伊闕晚灞上騎驢爾靡辱袁安高臥吾應  
覩忽然想生經行宋家陵往來寂寞東西京翹  
首淚下嵩山青

芝泮行

有序

崑崙子之來也李子觴焉及夜瓶芝  
自墮以爲泮行觴焉平可檠二觴行

之穩持之輕客大駭笑歡盡醉而李

子賦詩

霜嚴夜清月在南燈明酒溫客氣酣銅瓶玉芝  
鏗墮地客將傳玩誇神異仰芝把蒂行金杯蒼  
文古紫當筵開已驚湫灩菡萏動更詫屈錯蛟  
龍迴憶芝初出盤精氣雲流石立魍魎避赤箭  
琅玕色盡枯神訶鬼守求非易泄秘真遭天地  
怒懷珍顧使時人忌自從獲芝升我堂琴書几  
席俱輝光晴日徐看瑞氣合炎天每挹仙雲涼

燕山豪士來何方悲歌起舞宵未央芝乎自銜  
亦太異頓令四座深杯觴觴行逶迤月轉白月  
色芝光巧相射醅醕觸擊瑪瑙碎淋漓迸落真  
珠赤君不見玉屈卮金叵羅珠花繡草枉自艷  
停杯聽我芝梓歌

石將軍戰場歌

清風店南逢父老告我已巳年間事店北猶存  
古戰場遺鏃尚帶勤王字憶昔蒙塵實慘怛反  
覆勢如風雨至紫荆關頭晝吹角殺氣軍聲滿

幽朔胡兒飲馬彰義門烽火夜照燕山雲內有  
于尚書外有石將軍石家官軍若雷電天青野  
曠來酣戰朝廷旣失紫荆關吾民豈保清風店  
牽爺負子無處逃哭聲震天風怒號兒女牀頭  
伏鼓角野人屋上看旌旄將軍此時挺戈出殺  
胡不異草與蒿追北歸來血洗刀白日不動蒼  
天高萬里煙塵一劍掃父子英雄古來少天生  
李晟爲社稷周之方叔今元老單于痛哭倒馬  
關羯奴半死飛狐道處處懽聲噪鼓旗家家牛

酒犒王師休誇漢室嫖姚將豈說唐朝郭子儀  
沉吟此事六十春此地經過淚滿巾黃雲落日  
古骨白沙礫慘淡愁行人行人來折戰場柳下  
馬坐望居庸口却憶千官迎駕初千乘萬騎下  
皇都乾坤得見中興主日月重開再造圖梟雄  
不數雲臺士楊石齊名天下無嗚呼楊石今已  
無安得再生此輩西備胡

林良畫兩角鷹歌

百餘年來畫禽鳥後有呂紀前邊昭二子工似  
不工意吮筆決皆分毫毛林良寫鳥祇用墨開  
縑半掃風雲黑水禽陸禽各臻妙掛出滿堂皆  
動色空山古林江怒濤兩鷹突出霜崖高整骨  
刷羽意勢動四壁六月生秋濤一鷹下視睛不  
轉已知兩眼無秋毫一鷹掉頸復欲下漸覺颯  
颯開風毛匹綃雖慘淡殺氣不可滅戴角森森  
爪拳鐵迥如愁胡背欲裂朔雲吹沙秋草黃安  
得臂爾騎四鐵草間妖鳥盡擊死萬里晴空灑  
毛血我聞宋徽宗亦善貌此鷹後來失天子餓

死五國城乃知圖寫小人藝工意工似皆虛名  
較納馳騁亦末事外作禽荒古有經今 皇恭  
默罷游燕講經日御文華殿南海西湖馳道荒  
獵師虞長俱貧賤呂紀白首金爐邊日暮還家  
無酒錢從來上智不貴物淫巧豈敢陳王前良  
乎良乎寧使爾畫不直錢無令後世好畫兼好  
畋

吳偉松窓讀易圖歌

仄巖泉流石無數素壁濛濛起煙霧君家屋宇  
在 cities 何以堂上生松樹側聞江夏生氣酣掃  
毫素絕筆風雷拔地起意匠鑿天天爲怒泰山  
古根生眼前俄頃縮出徂徠山懸蘿掛薜裊裊  
黑復有草舍松之間牕間老人鬢髮禿手翻一  
編周易讀空山瑟瑟翠濤激長干冥冥暮花撲  
遠知旣已死希夷不復作青丘石室杳何許恍  
然置我此溪壑翻愁一夕雷電入六丁追書上  
寥廓又畫石下根屈曲如老龍胡奴瞑踏孤巖  
松蓬頭赤脚露兩肘月明汲泉山澗中却憶前

年召畫師江夏吳生亦與之短褐垢臉見  
天子禮貌雖村骨格奇 帝令待詔仁智殿  
有時半酣被召見跪翻墨汁信手塗白日慘淡  
風雲變 至尊含笑中官羨五侯七貴爭看  
面請觀此幅松舍圖黃金失價連城賤吳生吳  
生太氣岸一言不合輒投硯

邊貢

海樵吟

海樵老翁居海島自言不及山樵好山樵伐木  
歸作薪隆冬滿室回陽春海樵網得珊瑚樹窻  
底欲燃燃不去日將空腹對家人敢向山樵論  
飽飫中興天子元會辰大開閭闔羅九賓勅使  
四方求寶貨海樵尚食山樵餓

周司徒

周司徒真丈夫直氣稜稜霄漢俱致君不作堯  
舜主拂衣歸卧山中廬中山卧今幾載鶴貌童  
童履聲在十書五疏招不回九重虛席空相待  
北來頡利西羌胡爭問司徒今有無乃知繫國



輕重者不獨廟堂公與孤周司徒真丈夫

字

王九思

睹官軍赴潁上歌

銀鞍繡甲劍在腰馬鳴十里風蕭蕭羽旗猶轉  
杏花塢鐵騎先過楊柳橋將軍妙手逞輕捷一  
箭飛落雙皂鵬道傍觀者衆如堵奔走汗流喜  
欲舞老父歎息忽不樂暮年今見持戈斧七日  
賊圍潁上縣一縣萬人命如線聞說提兵李僉  
事日夜登城奮孤戰城中婦子愁唧唧恨不人

人生羽翼晨炊走汲井水竭夜號聲繞春雲黑  
步兵間道單身出簡書馬上飛來急豈謂轅門  
坐風雨不念愁城卧荆棘叢侍郎馬都督請君  
蚤發元戎燾淨掃烟塵四千里我亦西歸杜陵  
曲

王守仁

佛郎機和詠

有序

見素林公聞寧濠之變卽夜使人範  
錫爲佛郎機銃并抄火藥方手書勉

予竭忠討賊時六月毒暑人多道暍  
死公遣兩僕裹糧從間道冒暑晝夜  
行三千餘里以遺予至則濠已就擒  
七日子發書爲之感激涕下蓋濠之  
擒以七月二十六日距其始事六月  
十四僅月有十二日耳世之君子當  
其任能不畏難巧避者鮮矣况已致  
其事而能急國患踰其家如公者乎  
蓋公之忠誠根於天性故老而彌篤

身退而憂愈深節愈勵嗚呼是豈可  
以聲音笑貌爲哉嘗欲列其事于朝  
顧非公之心也爲作佛郎機私詠君  
子之同聲者將不能已於言耳矣

佛郎機誰所爲截取比干腸裹以鴟夷皮萇弘  
之血釁不足睢陽之怒恨有遺老臣忠憤寄所  
洩震驚百里賊膽披徒請尚方劍空聞魯陽揮  
段公笏板不在茲佛郎機誰所爲

朱應登

函谷關歌

朝出洛陽城暮投函關道函關日落行人稀滿  
目黃雲暗秋草此地古來西屬秦崩城敗壁猶  
嶙峋牛車冉冉行不盡更愁怪石摧車輪關門  
老子去已遠吾生學道嗟何晚紫氣猶經舊路  
迷青牛不見當時返只今豺虎正縱橫羽檄星  
馳大點兵徼巡司隸督責苦關下居民日夕驚  
疎林漸指新安麓夜火人歸茅店宿雞鳴客起  
四散分令人忽憶孟嘗君

入桃川塢悵然興懷得長句

朱子好奇世所無平生癖在山水隅每逢異境  
輒耽賞委意登陟忘勤劬東觀大海西絕胡南  
臨越嶠北上都桂檝晨經屈子水襜車夜宿降  
王廬十年踪跡半海內吞噬河嶽填微軀茲晨  
更入桃川塢丹峰翠壁羅芙蓉便令心目兩開  
豁卽欲駐足停飛鞚僕夫逡巡却行立脣乾吻  
燥煩招呼始從谷口入隈隩漸轉山麓登盤紆  
攀援古木沂流水盤僻怪石穿寒蕪丹梯杳靄

上欲盡回首動色神魂輸當年太守往難卽前  
度漁郎今莫須世徂靈品亦超化惟見古洞苔  
模糊青蘿掩映白石膚髣髴隔水來仙姝臨風  
指點少延佇日莫不至空踟躕人生取好意各  
殊鴟鵂鷂雀難共圖繇來俗眼尚紛紜亦或謂  
我如癡愚長安九門通九衢金馬玉署貴者趨  
奉身何啻廁中鼠繫足豈殊轅下駒乃知達士  
秉昭曠世上兒子徒區區

湖上送別華玉作長短句歌

爾從京華來問我滄洲路暫作淮南留相攀桂  
花樹桂花團團蔭楚宮秋來樹樹起香風歸驂  
向月停金絡寶劍當門解玉虹主人聞客來終  
日笑顏開盤中苜蓿琅玕頴甕裏瓊漿琥珀醅  
五湖雲水淨無埃還似山陰雪下回放浪每爲  
河朔飲風流重接建安才一夕復一夕開軒偶  
瑤席不知逸興安從生坐使窮愁向君失我生  
寡聞道四十已歸田豈爲折腰思絕粒翻令傷  
翻惡驚弦黃河之清那可俟世人視我尋常耳

釣竿不挂吞舟魚疇昔論交竟誰是感君山嶽  
心眷我無轉移送君江海恨不長追隨他時  
若有天台興儻寄與公一賦之

康海

聽韓景文彈琵琶

公罷官後喜彈琵琶  
作玩世態故發揮獨

透

關西弟子彈琵琶武氏成名已三世勝死忠老  
傳授稀尚宵已近六十二要妙誓不教女兒精  
微安肯輸同事武功少年韓景文杳撥檀槽酷

能似點打鈎挑色色精調停布置俱神異大曲  
渾涵小曲媽羣宮衆調無窺避始知絕藝本天  
成誰云末技非難致清秋八月賓客來尊俎未  
列管絃開立酌停歌兩三酸此聲一出人盡駭  
倉庚微吟柔桑底凍竹乍裂淇園隈遊蜂逐萼  
遠不歇曲嶺回巒繁更催千山夜落九天雨空  
谷朝驚三月雷悠揚拂掉轉相勝開唱遞互清  
且哀鐵騎橫來長樂坂神女坐對陽雲臺閑庭  
翻絮去閃爍絕壑墮石來碕磈曲曲宛轉意態

別三百四十猶往回憶昔京華公宴日教坊子弟紛紛出三院都輸張學彈數年頗會聲音悉以此常誇武氏高汝今操縱如畫一夜深客醉席屢更四座嗟咨未忍行曲終更奏不知旦戶外驚聞繁雀鳴

王廷相

南昌行

豫章妖星蝕太白飛入勾陳闕光赤欽天博士不敢奏遠臣見之空嘖嘖周公卜鼎八百春漢

代規摹遠過秦山東諸侯自破滅淮王雞犬安能神白洲老子中臺長何用文章諛新莽慶陽鄙夫稱雄特學得兵書翻助賊南風不競北人力東門黃犬嗟何及君不見河南許汝登皎皎真丈夫口中舌可斷萬歲不肯呼匣裏寶刀光電電悔不先發梟賊顛報國心丹不言苦甘死寧能效囚虜已拚魂作太湖雲何惜血染洪州土黃霾塞天白日昏長風翻江帝心怒鄱陽未接勤王師坐令狂奴氣先阻汝登汝登振古豪

吞聲苟免蜉蝣曹

白洲李仕實慶陽李  
夢陽也汝登許達也

### 碣門行

君不見益州西下碣門路中使通番從此去  
烏思藏接金天洋祇陀林園在何處三千法供內  
中傳梯航直入西南天珠旛龍象疑靈雨寶帳  
蓮花鬪日躔法王十五心尚孩袖裏不聞風與  
雷使臣百問不一答說向中朝色似灰妖僧鬼  
蜮心冥冥疲勞中土玩明庭我

皇神聖懸

日月爾曹誅絕應無輕渤海流賊飛颺疾薊門

胡馬連雲黑佛來不來賊誰平天地闇慘愁無力

### 胡桃溝行

松州之南茂州北豺狼當道儲餉厄中丞調兵  
急於火夜裏平番碣房破遊擊將軍張世賢赤  
心殺賊不愧天胡桃溝裏被圍急彎弧四顧心  
茫然高岸當前後番虜箭鏑奔雷闢地戶胡騶  
不幸誤一蹶徒手猶能搏彫虎芮家叅將才且  
都守邊不數丁大夫忍令對面不相救安在奮

勇西擊胡幾人同來不同死將軍血作溝中水  
生時豪氣雄萬人死後忠魂報

天子邊

城二月吹蘆笳怨聲番入胡桃花胡桃花開白  
練練溝底行人淚如綫

何景明

偏橋行

城頭日出一丈五偏橋長官來擊鼓山南野苗  
聚如雨饑向民家食生牯三尺竹箭七尺弩朝  
出射人夜射虎砦中無房亦無堵男解蠻歌女  
解舞千人萬人爲一戶殺血祈神暗乞蠱沙蒸  
水毒草根苦上山下山那敢戲蠢爾苗民爾毋  
侮虞庭兩階列干羽

官倉行

長棘周袤三丈垣高門鐵鎖緘兩關黃鬚碧衫  
下厥吏白板朱書十行字帳前喧呼朝不休剪  
旌分隊聽唱籌富家得粟堆如丘大車檻檻服  
兩牛鄉間餓夫立墻下稍欲近前遭吏罵

崔生行

有序



予之至京師也友人崔太史子鍾見  
之曰久不聞何子言矣爲我作崔子  
行

崔生自返金陵謫騎馬復走長安陌時危頗負  
經濟才海內但識文章客自從盜賊近神京四  
海不見烟沙清黃河流血日慘怛中原戰骨霜  
縱橫朔風兵馬又已弱天下財賦難盡權書生  
不得言世務大臣誰有匡時略我到長安訪交  
友子與河內尤相厚感君戀故有綈袍吐膽傾  
心共杯酒六年更見玄都花萬事空傷薊門柳  
河內憂時未解顏子亦談兵不輟口金礦玉璞  
隱光曜紫氣龍泉鬱盤久議論反遭時輩忌形  
容豈免流俗醜王良伯樂不在御驕騶馱裏徒  
能走人言古人未可輕古人往往皆無成子雲  
老大不曉事殷浩當時空有名事去誰應嗟白  
首時來未必濟蒼生卽今風塵尚瀕洞羽檄飛  
符遞相送西北山河戰角悲東南天地軍麾動  
江海未見魯連耻朝廷不聞賈生慟塵埃早知

才質殊霄漢况覩名聲重闕宮清廟待琴瑟大  
厦明堂要梁棟天生公等世所須努力他時有  
大用

篇中河内何粹夫塘也

### 樂陵令行爲許達作

山東郡縣一百八無有一城無戰場到今漂血  
成野水如山白骨橫秋霜雲臺功高將不收投  
筆亦有書生謀黃金大印賜豪貴白面豈得言  
封侯唐朝公卿集如雲平原太守名不聞二十  
四城見賊走抗城乃是平原君君不見前者寇  
盜時縣吏州官各亡命北梁白馬終日行濟上  
黃旗錯相映不聞開門戰但聞開門迎嗟乎平  
原太守樂陵令

### 馮都督歌

都督猛氣世不多一日百戰千里過賊頭纍纍  
十萬馱東至滄海南黃河宋門西平傳凱歌洛  
水轉闕風揚波虜營晝雨淋滂沱面貫雙箭猶  
揮戈君不見諸將歸來金滿室生封萬戶食千  
邑都督河頭死爲伯

楊循吉

都下將歸述懷

鄙人自從三月來腹心久已病癥瘕晨興至午  
尚不食夜枕呻吟睡尤寡蕭然一榻但高臥雖  
有心曲誰與寫有人謂我病如此何不抽身向  
林野一聞此言卽再拜誰有愛人如此者久知  
山水淡有味漸覺功名輕可捨况今一病已到  
骨兼與世事多痲痺病人自合臥活命安能奔  
走還騎馬大凡決事在已心謀之朋友惡乎已  
乘今秋至天漸涼定買扁舟向南下諸君請自  
各努力余非引高毋誚罵

周用

聞笛

寒星磊落愁不平爲携長笛悲秋清江妃掩面  
解佩泣山鬼照火黃狐鳴雲門古樂嗟無及后  
夔已去絲絃急夜半淒淒不可聽陰風吹雨蒼  
厓濕

嶺南大征

材官先驅平賊壕奔蛇失穴窮猿號海水淨洗  
大食刀烏蠻髑髏含血臊何物稚子懷脂膏西  
臺白筆不可撓衡平豈得私爾曹縮首且勿干  
秋毫論功無乃賢獨勞敢使法則同廉饗青春  
攬我白獸袍坐覺炎裔風颺颺國家制作得所  
遭鉅手合並諸公操行行明發瞻旌旄雲日晻  
靄衡山高

走百病行

都城燈市繇來盛大家小家同節令諸姨新婦

及小姑相約梳妝走百病俗言此夜鬼穴空百  
病盡歸塵土中不然今年且多病臂枯眼暗兼  
頭風踏穿街頭雙綉履勝飲醫方二鍾水誰家  
老婦不出門折足蹒跚曲房裏今年走健如去  
年更乞明年天有緣蘄州艾葉一寸火只向他  
人肉上然去年同伴今無有幾年可卜明年走  
長安主人肯居停寂寂關門笑後生但願中秋  
不見月博得元宵雨打燈

紙繖

青衫短製朱角鬢隻輪獨踏車班班后夔一足  
行不艱容易闔闢摩玄關爲君稍稍歌東山當  
時零人早當還束身乾沒耐燥濕苦竹淚掩湘  
妃斑誰家浮雲蔽白日咫尺天威違汝顏杜陵  
寒士勿等閒此中大厦千萬間

陸深

楊白花

擬賦

楊白花隨風起春風吹江隔江水楊花飛度江  
水東綺房繡闥珠簾櫳不恨花無主但恨花無  
力一夜風來留不得

新釘篇

有序

有新進士者

不欲名

其健僕譁于國子

先生之門曰汝舊釘也我新釘也新  
釘使得應舊釘使不應云云予聞之  
爲賦新釘篇

曾聞新人不如故今見舊釘不如新沙枕苔臥  
土花澁鑽刺無功愁殺人嗟爾釘同一鐵先穎  
脫遂鳩拙不見赤日中炙手或可熱天道每如

此人事安足說噫噦噦少婦利口可以出走疆  
奴制家閉目搖手國乏老成典刑誰守歲寒之  
姿松柏是有願汝且弗嗔勸汝一杯酒可憐舊  
釘曾爲新那愁新釘不爲舊

孟洋

沽酒行贈牟韋二撫君

漢陽江上秋風悲落葉淒淒愁別離江頭壯士  
一相見並馬躊躇數回盼青衫烏帽無光輝云  
是長安兩錦衣見君北來動鄉思君來想是從

王畿牟公短軀異標格雙頰凝紅鬢垂白韋君  
年可四十強方眉廣額身昂藏欲言向余淚盈  
臆昔年奉侍君王側日月麒麟殿上行雲霄虎  
豹班中直常承密旨按公卿時有微功佐家國  
詎料榮恩不可常朝遊禁闕暮江湘遙瞻北斗  
空翹首却想西垣祗斷腸北地南州異風土天  
暄水濕多憂苦鴻雁高高向日邊關河迢遞何  
時還嗟余亦是投荒者低首聞之淚雙下  
先朝末載遊帝京此時牟公已有聲自從逆醜

弄權術鞭撻朝士無虛日扶忠抗義公所優坐  
廢罹刑人共恤今皇誅逆法令明韋公牟公  
乃齊名纔看執法拖金紫忽復飄零涉江水貧  
賤榮華信有時古今人事皆如此君不見張祿  
先生脫厠中相秦富貴傾王公又不見魯朱家  
奴置廣柳時來復作河東守與君今見且爲歡  
別買江魚共沽酒

殷雲霄

秋雨歎二首

陰雲伏雨回秋光病骨却愛秋風涼杖藜高歌  
猶清狂南歸鴻鴈鳴且翔我欲射之心悲傷嗚  
呼歲暮山中人未歸山中茅齋今是非  
今年雨多不傷農村醪社鼓歌年豐漁父懶慢  
網罟空長官病起深山中再拜爲民祝華嵩嗚  
呼千倉萬箱安能足山中今有逃亡屋

鄭善夫

汶上對月聞笛作商調哀切命船人度  
曲爲和賦醉歌

焉者八月高風起鴻鴈羣飛渡江水月下清砧  
愁遠人天涯芳草思公子王郎哀時最蕭索萬  
里迢迢向南國呼我上船設冰鱠仰天頌酒開  
胸臆關山茫茫何處邊但見急管哀中天馮夷  
聽曲波面出楊柳亂落西風前酒酣月落歌未  
已隴思江情嗒然起未掛姓名玉策上願添海  
水金樽裏人生合歡那可測有似大海翻萍葉  
回首親朋各別離豈無江漢通舟楫流光過鳥  
不復駐達官好爵身之蠹况迺豺狼橫地軸何  
限驕騮窘天步竹林諸賢皆酒徒嗣宗只願步  
兵厨古來賢達一澌盡醉鄉之托今何如

林春澤

寧庶人故宮

君不見豫章城中闐闐簇中墟莽然一平陸丹  
楹剝落朱門扃可憐舊是黃金屋雕甍碧瓦飛  
寒灰玢石奇花輸轉轂粉黛消沉野草迷館娃  
香逕蒼苔沒陰渠瓦礫雜頽垣風雨啾啾鬼夜  
哭曾聞麋鹿遊姑蘇果見市朝變陵谷憶昔



高皇定寰宇親王玉牒皆茅土天潢流派  
願靈長麟趾國風播終古邇來覆轍何相尋令  
人三歎心悲憫前有猖狂漢庶人後有颯颯寧  
化豎癯仙不解貽嘉謀遺爾孽濠猛於虎王門  
千乘豈不崇胡爲染指窺金釜雞豚搜索哭茅  
茨舢艫叫突走商賈蛾眉奪入歌舞臺曳裾半  
集逋逃虜權門結賂擠忠良軍帳椎牛咽簫鼓  
自矜叱咤風霆生觸轍便作螳螂怒豈知宗社  
威靈未可移黃圖自有金湯固汲黯未寢淮南

謀亞夫一舉收吳楚君不見安慶城中星砲飛  
狐羣褫魄浮江歸王家渡口赤幟起踉蹌失色  
沉江底故宮雪焰漲天紅滿城焦土隨飄風潞  
河一夕齏粉空祗今西江之上但聞孫許之烈  
陽明功

徐禎卿

曹別駕畫山雞歌

東昌曹侯擅丹青天機觸手隨風雲戲貌山雞  
歛出草錦毛霞翅回續紛蹙距昂頭勢欲移似

猜羅網立還遲家雞突見甘一决對此凝然仍  
自疑

楊慎

禹碑歌 并序

禹碑在衡山絕頂韓文公詩云岫嶺  
山尖神禹碑字青石赤形模奇科斗  
拳身薤倒披鸞漂鳳泊挈龍螭事嚴  
跡闕鬼莫窺道士獨上偶見之我來  
咨嗟涕漣而干搜萬索何處有森森

綠樹猿猱悲詳詩語始終公蓋至其  
地矣未見其碑也所謂青字赤石之  
形模科斗鸞鳳之點畫述道士口語  
耳若見之矣發揮稱贊豈在石鼓下  
哉迨宋朱張同遊南岳訪求復不獲  
後晦翁著韓文考異遂謂衡山實無  
此碑反以韓詩爲傳聞之誤云再考  
六一集古錄趙明誠金石錄鄭漁仲  
金石略之三家者古刻臚列無遺獨

不見所謂禹碑者則自昔好古名流  
得見是刻亦罕矣碧泉老子得墨本  
於楚持以貺予予撫卷而嘆曰嗟乎  
韓公所謂事嚴跡闕者信夫不然何  
三千餘年而完整無泐如此何昔之  
晦何今之顯晦者或翳之顯何或啓  
之天壽珍物神飫吾嗜不必以生世  
太晚爲恨也已作禹碑歌以祀之紀  
神禹碑在响嶠尖祝融之峰凌朱炎龍畫傍分

結構古螺書匾刻戈鋒鈇萬八千丈不可上仙  
扁靈鑰幽以潛昌黎南還曾一過紛披芙蓉塞  
水簾天柱夜瞰星辰下雲堂朝見陽輝暹追尋  
夏載赤石峻封埋古刻蒼苔黏拳科倒薤形已  
近鸞漂鳳泊辭何纖墨本流傳世應罕青字名  
狀人空瞻永叔明誠及夾漈集古金石窮該兼  
臚列箴銘暨款識橫陳軒轅和釜鬻胡爲至寶  
反棄置捃摭磨蟻捐烏蟾又聞朱張遊岳麓霽  
雪天風影佩檐搜奇索秘跡欲徧春倡撞和詩

無厭七月崎嶇信有覲一字膏馥寧忘拈非關  
嶸嶸阻登陟定是藤葛籠窺覘好古予生嗟太  
晚拜嘉君貺情深忻老眼增明若發覆尺喙禁  
斷如施箝七十七字挈螭虎三千餘歲叢蛇蝮  
憶昔乾坤漏息壤蕩析蒸庶依苓慘帝嗟懷襄  
吝文命卿佐洛洞分憂悞洲并渚混沒營窟鳥  
迹獸迹交門簷鳩來南雲又北夢直罄西被仍  
東漸黃能三足變鮫服白狐九尾歌龐裊後乘  
包湖受玉籙前列溫洛玉疇蠃永奔竄舞那辭

字

胝平成天地猶垂謙華嶽泰衡祇鎮定鬱塞昏  
徙逃喁噉文章絢爛懸日月風雷呵護環屏黔  
君不見周原石鼓半已泐秦湫楚詛全皆殲此  
碑雖存豈易得障有嵐靄峰巘巖楚音復絕柱  
藜藿吊影颯瑟森櫛栴湘我遺佩冷斑竹山鬼  
結旗零翠歛造物精英忌洩露祇恐羽化難留  
淹欲摹拓本鐫崖壁要使好事傳緗縑著書重  
釘琳瑯譜裝帖新耀瓊瑤籤麝煤輕翰蟬翅榻  
煩君再寄西飛鷁

歐陽六一每遇難韻輒行崛強公作似之終





